



Italia
Von Gallia

ccvii

angefangen ist. Venedig die reichste / Meyland die größte / Genua die hochfertigste / Sorrent die hübschste / Bononia die hochfertigste / Ravenna die älteste / Neapolis die Edleste / vnd Rom ein Haupte der Christlichen fromkeit. Vnd dieweil etlich stett haben jren nammen verendert / wil ich deren ein theil hie erzelen vnd anzeigen wie vor alten zeiten / vnd wie sie jezundt genennt werden / vnd wo sie gelegen seind.

Paglia oder Paphy hat vor zeiten Ticinum geheissen / vnd do ward der König von Frankreich vor wenig jaren gefangen. Sie ist vor zeit also mechtig gewesen / das sie in der größe / hübsche / vnd würdigkeit nie minder geachtet ward dan Meyland. Aber jezundt ist Meyland über sie kommen.

Etruria vnd Tuscia / zu vnsern zeiten Tosconia.

Hydrus vnd Hydruntum / jezundt Otranto.

Verona / auff Teütsch Bern / etlich nennen es Dietrichs Bern / dann der König Dietrich hat es zum ersten gewonen / vnd andere stett darauff kriegt. Von diesem Dietrich sage man vil / dz doch in den warhafftigen historien kein grund hat.

Forum Julij / zu Teütsch Frieul / oder Frieül / ein lendlin das in Histria oder Istrien liegt / ist vor zeiten ein namhafte stadt gewesen / die aber gar zugrundt ist gangen.

Padua / vnd vor zeiten Patavium / ligt in der Venediger Land / vnd in der markt von Ternis.

Tergestum zu Teütsch Triest / gelegen in Histria / do der gürt wein Keinsal wechselt.

Imola vor zeiten Forum Cornelianum / ligt in Flaminta.

Alexandria zwischen Meyland vnd Genna gelegen / ist gebawen von Papp Alexandro / wider Keyser Seiderichen den ersten / damit er die Lombardey nit behalten möcht.

Neapolis ein alte stadt / hatt vor zeiten Parthenope geheissen / wie Titus Livius schreibt.

Venetia oder Venedig / ein mechtige stadt zu land vñ wasser / ist etwan nur ein land gewesen / das vnder ihm vil stett hat / wie du hernach hören wirst / so ich jren vrsprung beschreiben wird.

Aquileia / ist vor zeiten ein große herrliche stadt gewesen in Histria / aber zu vnsern zeiten hatt sie vil volck / vnd wirt Alger genempt.

Genua oder Janua vnd Genoua / ist vor etlich jaren ein mechtige stat auff dem möre gewesen / dan sie hat gehabt land vnd leüt / vnd inslen bis in das Griechen land. Die stadt Pera gegen Constantinopel gelegē / ist jr vor etlich jaren vnderthänig gewesen / des gleichen die insel Chios / die stat Capha in Taurica Chersoneso.

Jrem die stadt Samagusch in Cypren / vnd die insel Mitylene seind vnd den Genuesern gewesen. Aber sie haben in kurtzen jaren allen gewalt auff dem möre verloren. Wie diese stadt kommen ist zu jrem großen gewalt / wirt hie vnden nach Meyland weitläuffiger angezeit.

Sorrent ein edle vñ hübsche stadt in Etruria / hat 90. jar vor Christi geburt jren anfang genommē. Aber Totila der Gothen König zerbrach sie / do er Italien verwüster / vnd ward darnach widerumb durch den grossen Carlen gebawen vnd in ein rindmaur gefaßt.

Brygia vnd in gemeiner sprach Driß / ligt nie weit von dem Gard see. Die andern nennen sie Brega.

Sipontus in Apulia / ein bischoffliche stadt heist zu vnsern zeiten Manfredonia. Doch nemen die andern Manfrediniam für Apenecke.

Von Rom